



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0027378 25
Sarajevo, 18.11.2025. godine

Na temelju člana 35. stav 2. tačka e) te člana 216. stav 3. Zakona o kaznenom postupku Bosne i Hercegovine, donosim

N A R E D B U
O NEPROVOĐENJU ISTRAGE

U vezi mail-a pod nazivom „Prijava govora mržnje i javnog vrijeđanja po vjerskoj osnovi – „(...)“ B.“, od ... 2025. godine, koji je na zvaničnu mail adresu Tužiteljstva poslat od strane „(...)“, putem mail adrese ..., zbog počinjenja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH, nakon izvršenog uvida u spis predmeta, a u smislu odredbe člana 216. stav 3. Zakona o kaznenom postupku Bosne i Hercegovine, donesena je Naredba o neprovođenju istrage iz razloga jer je iz prijave i pratećih spisa očigledno da prijavljeno djelo nije kazneno djelo.

O B R A Z L O Ž E N J E

Tužiteljstvo Bosne i Hercegovine zaprimilo je, dana ... 2025. godine, mail pod nazivom „Prijava govora mržnje i javnog vrijeđanja po vjerskoj osnovi – „(...)“ B.“, koji je na zvaničnu mail adresu Tužiteljstva poslat od strane „(...)“, putem mail adrese ..., zbog počinjenja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. Kaznenog zakona BiH od strane izvjesnog „(...)“, koji je putem svog ... profila, po navodima iz predmetnog mail-a, napisao komentar sljedećeg sadržaja: „(...)“ ako je od pedofila muhameda mnogo je...sumnjive ličnosti koji je stvorio alaha u 7 vijeku..kome ti vjerujes, slaba si ličnost i bet ikakvog znanja..“

U tom smislu, podnositelj prijave je u predmetnom mail-u naveo da ovakav komentar predstavlja javno vrijeđanje muslimana i islama, širenje vjerske netrpeljivosti i mržnje, te da je protivan Ustavu BiH, Europskoj konvenciji o ljudskim pravima i Zakonu o zabrani diskriminacije.

U prilogu mail-a je dostavljen screenshot fotografije objavljenog komentara od strane ... korisnika „(...)“, kao i link predmetnog ... profila.

U cilju provjera navoda iz zaprimljenog mail-a, Tužiteljstvo Bosne i Hercegovine je, dana ...2025. godine, Državnoj agenciji za istrage i zaštitu izdalo Naredbu za preduzimanje mjera i radnji, kojom je naređeno da se identifikuje, locira i u svojstvu svjedoka, a na okolnosti podnesene prijave, sasluša njen podnositelj, „(...)“, te da imenovani decidno objasni na koji način i kojim povodom je došao u komunikaciju sa prijavljenim licem, da li ga lično poznaje, kao i da navede kakve osjećaje je kod njega izazvao predmetni komentar. Naredbom je, također, traženo da se putem otvorenih medija ili na drugi prikladan način locira profil na društvenoj mreži ... na dostavljenom linku <https://www...>, te da se po njegovom pronalasku, locira predmetna objava, na koju se odnosi zaprimljena prijava, i da se nad njom preduzmu uviđajne radnje i sačini fotodokumentacija.

Postupajući po Naredbi Tužiteljstva, broj: ... od ...2025. godine, Državna agencija za istrage i zaštitu je dostavila svoj Akt, broj: ... od ...2025. godine, uz koji je dostavljen Izvještaj o postupanju, broj: ... od ... 2025. godine, u čijem prilogu su dostavljeni Zapisnik o uviđaju, broj: ... od ...2025. godine, fotodokumentacija, broj: ... od ... 2025. godine i Zapisnik o saslušanju svjedoka, broj: ... od ...2025. godine.

U Zapisniku o uviđaju Državne agencije za istrage i zaštitu navedeno je da je, postupajući po Naredbi Tužiteljstva Bosne i Hercegovine, broj: ... od ...2025. godine, izvršen uvid u sadržaj linka <https://www...>, koji se odnosi na objavu na ... profila „Crna hronika BiH“ od ...2025. godine, pod nazivom „ (...)“ a najavio kolektivno klanjanje u Š. B.“, na kojem je postavljeno 876 komentara i 17 dijeljenja. Pregledom navedenih komentara, pronađeni su komentari koji su postavljeni od strane korisnika ... profila „ (...)““, i to komentar: „ (...)“ ako je od pedofila muhameda mnogo je...sumnjive ličnosti koji je stvorio alaha u 7 vijeku..kome ti vjeruješ, slaba si ličnost i bez ikakvog znanja“, kao i komentar sadržaja: „ (...)“ to su činjenice, kakve mržnje ba..ispado ja kriv što ti vjeruješ u laži I budalastine jel..nije tebi dobro izgleda“.

Nadalje, u Zapisniku o uviđaju je navedeno da je izvršen pregled otvorenog ... profila pod nazivom „ (...)“, ID broj: ..., kojom prilikom su zabilježene javno dostupne informacije o navedenom licu, u kojima je navedeno da je imenovano lice iz ..., a da živi u ..., Bosna i Hercegovina.

U svojoj izjavi, datoj na Zapisnik o saslušanju svjedoka Državne agencije za istrage i zaštitu, podnositelj prijave, „(...)“, naveo je da je on na portalu „Crna hronika“, ispod članka koji se odnosio na obavljanje namaza na javnom mjestu u Š. B., napisao određeni komentar, istakavši da njegov sadržaj ne vrijedi nikoga, ali da mu je na njega odgovorio korisnik ... profila „ (...)“, koji je u svom komentaru napisao: „ako je od pedofila muhameda, sumnjiva je ličnost“, istovremeno navodeći da je „(...)“ slaba ličnost, bez ikakvog znanja. Nadalje, svjedok je istakao da je poslije tog komentara on napisao da će ga prijaviti policiji zbog govora mržnje, nakon čega mu je ... korisnik „ (...)“ odgovorio: „kaka ba mržnja“ i da on nije kriv što „ (...)“ vjeruje u laži i budalastine.

Podnositelj prijave, svjedok „(...)“, je naveo da se pomenutim komentarima iskazuje mržnja, da isti pridonose razdoru unutar društva i između naroda u Bosni Hercegovini, da predstavljaju jasno vrijeđanje na vjerskoj osnovi i da kod njega izazivaju uznemirenost i nelagodu. Svjedok je u svojoj izjavi naglasio da podnesena prijava nema za cilj nanošenje štete prijavljenom licu, već njegovu edukaciju i buđenje svijesti i spoznaje da živi u multietičnoj sredini.

U konkretnom slučaju, podnositelj prijave prijavljuje govor mržnje i javno vrijeđanje po vjerskoj osnovi, što upućuje na eventualno počinjenje kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a stav 1. Kaznenog zakona BiH.

U stavu 1. navedenog člana Kaznenog zakona BiH je propisano:

„Ko javno izaziva ili raspiruje nacionalnu, rasnu ili vjersku mržnju, razdor ili netrpeljivost među konstitutivnim narodima i ostalima, kao i drugima koji žive ili borave u Bosni i Hercegovini, kazniće se kaznom zatvora od tri mjeseca do tri godine.“

Analizom cjelokupnog spisa predmeta, odnosno, prikupljene dokumentacije, kao i samog sadržaja prijavljenih komentara, Tužiteljstvo Bosne i Hercegovine cijeni da iz zaprimljene prijave i priloga dostavljenih uz istu proizilazi da prijavljeno djelo nije kazneno djelo.

Naime, Tužiteljstvo smatra da sadržaj predmetnih komentara ... korisnika „(...)“ nije objektivno pogodan da javno izazove ili raspiruje nacionalnu, rasnu ili, u ovom slučaju vjersku, mržnju, razdor ili netrpeljivost među konstitutivnim narodima i ostalima, kao i drugima koji žive ili borave u Bosni i Hercegovini, odnosno, da se istim ne ostvaruju obilježja kaznenog djela Izazivanje nacionalne, rasne i vjerske mržnje, razdora i netrpeljivosti iz člana 145a. stav 1. Kaznenog zakona BiH, kao niti nekog drugog kaznenog djela.

Uzimajući u obzir prethodno obrazloženo, Tužiteljstvo Bosne i Hercegovine je, u smislu člana 216. stav 3. Zakona o kaznenom postupku BiH, donijelo Naredbu o neprovođenju istrage iz razloga jer je iz prijave i pratećih spisa očigledno da prijavljeno djelo nije kazneno djelo.

Shodno članu 216. stav 4. Zakona o kaznenom postupku BiH, Tužiteljstvo Bosne i Hercegovine će, u Zakonom propisanom roku, obavijestiti podnositelja prijave o donošenju ove Naredbe i o mogućnosti ulaganja pritužbe protiv iste Uredu tužitelja u roku od 8 (osam) dana od dana zaprimanja Obavijesti.

**TUŽITELJSTVO/TUŽILAŠTVO BiH
TUŽITELJ**